

CARTA NDÍÍ 'IINŪ YEⁿ'E SAN JUAN

Yeⁿ'e saⁿ'ā Gayo chi n'dai

¹Úú Juan, saⁿ'ā chi ngaⁿ'a ntiiⁿnyuⁿ yeⁿ'e yáacū idinguúⁿ carta 'cūū yeⁿ'e saⁿ'ā Gayo chi cuaacu nííⁿyúⁿ neⁿ'e taaví saⁿ'ā.

²Díí saⁿ'ā Gayo chi neⁿ'é, 'úú neⁿ'é chi cáávā maaⁿ di tanducuéⁿ'ē chi véé yeⁿ'ē di ní n'dai taavi. Níícú véé vaadí 'viichéé yeⁿ'ē di tan'dúúcā chi alma yeⁿ'e di véé vaadí 'viichéé yeⁿ'ē. ³Nduudu cuaacu chi neene yeenú taachi ndaā vi'í yú chi caⁿ'a yā nduudu cuaacu yeⁿ'ē di chi n'daācā diiⁿ di, tan'dúúcā chi 'áámá idiíⁿ di chiíⁿ chi cuaacu. ⁴Nguéé ch'etete ca vaadí yeenu yeⁿ'é chi ch'iindiveéⁿ chí daiyá dííⁿ yā chiíⁿ chi cuaacu.

⁵Dii chi neⁿ'é, tanducuéⁿ'ē chi diiⁿ di, n'daācā n'dai diiⁿ di ndúúcu vi'í yú ndúúcu 'iiⁿ'yāⁿ chi ngiica ná yúúní. ⁶Iiⁿ'yāⁿ miiⁿ ngaⁿ'á yā nduudu cuaacú yeⁿ'e vaadí neⁿ'e yeⁿ'e di nanááⁿ 'iiⁿ'yāⁿ chi snūⁿ yaācū. Nduuti chi cunnéé dí 'iiⁿ'yāⁿ tan'dúúcā chi canéé chi diiⁿ di ní tan'dúúcā chi neⁿ'e Dendyuūs chi diiⁿ di, tuuⁿ'mi ní n'daācā idiíⁿ di. ⁷Caati 'iiⁿ'yāⁿ cueⁿ'é yā 'muuⁿ cueⁿ'é yā miiⁿ cucáávā chi neⁿ'é yā caaⁿ'máⁿ yā yeⁿ'e Cristo. Nguéé

dé'ē vεε sta'á yā yeⁿ'ē 'iiⁿ'yāⁿ chi nguéé yeⁿ'e ndaata yeⁿ'é yā. ⁸S'uuúⁿ ní canee chi 'cuaaⁿ yú 'iiⁿ'yāⁿ s'tíí. Níícú cuuvi cunée yā ndúúcu yú 'iiⁿ'yāⁿ chí idiíⁿ yā ntiiⁿnyuⁿ yeⁿ'e vaadí cuaacu.

Saⁿ'a Diótrefes nguéé n'daācā diiⁿ sa

⁹Úú nidinguúⁿ yeⁿ'ē 'iiⁿ'yāⁿ yeⁿ'e yaācū caati Diótrefes nguéé 'cuaaⁿ sa nús'uu ti néⁿ'é sa caaⁿ'maⁿ ntiiⁿnyuⁿ sá yeⁿ'é yā. ¹⁰Cáávā chuū taachi 'úú chi ndaā tuuⁿ'mi ní nin'gaacú tanducuéⁿ'ē chi diiⁿ sáⁿ'ā miiⁿ. Taatii caⁿ'ā sa yeⁿ'e s'uuúⁿ ndúúcu nduudu taaⁿ chi nguéé n'daācā taatii 'caā'vā sa contra yeⁿ'e s'uuúⁿ. Ní nguéé yeenú sá ndúúcu dendu'ū. Nguéé n'guuⁿ sa vi'í yú. Ní nguéé neⁿ'e sa chi tanáⁿ'a yā chi 'cuaaⁿ yā vi'í yā. Níícú tun'dáa sa 'yā chεeti yaācū.

¹¹Díí chi neⁿ'é, nguéé diiⁿ di chiíⁿ chi n'diichi di chi nguéé n'daācā. Diiⁿ di chi n'daācā. Du'ū chi din'daācā ní yeⁿ'ē Dendyuūs. Du'ū chi nguéé n'daācā nidiiⁿ ní nguéé n'dííchí Dendyuūs.

Saⁿ'a Demetrio, n'daācā idiíⁿ sa

¹²Nducyáácá yā ngaⁿ'á yā nduudu cuaacu yeⁿ'e saⁿ'ā Demetrio. 'Āā

'tiicá nūuⁿ nduudu cuaacu n'giⁿi
 vida yeⁿ'é yā. 'Tiicá ntúūⁿ s'uuúⁿ
 ngaⁿ'a yú ndúúdú cuaacu yeⁿ'e yā.
 Ní ndís'tiī deenú ni chí ngaⁿ'ā yú
 nduudu cuaacu yeⁿ'é yā.

Ch'iinū carta maaⁿ

¹³Nééné véé yeⁿ'é chi neⁿ'é
 dingúúⁿ yeⁿ'e ndís'tiī naati nguéé
 neⁿ'é dingúúⁿ ndúúcū tinta ndúúcū
 pluma.

¹⁴Caati neⁿ'é n'diichí ndís'tiī núúⁿ
 nīīⁿyūⁿ ní caaⁿmáⁿ ndúúcu di ní
 ndís'tiī nduucú.

¹⁵'Diiíⁿ canéé ndúúcū di.
 Amigos yeⁿ'e s'uuúⁿ dichó'o
 yā: N'daí n'diī, ngaⁿ'a yā. Dii
 dichó'o di: N'daí ndís'tiī, yeⁿ'ē
 amigos yeⁿ'e s'uuúⁿ taachi yaa'vi
 di 'iiⁿ'yāⁿ ca'áámá ca'áámá yā
 caavā chi duuchí Cristo. 'Tífcā
 cuuvi.